

आकाशवाणी जयपुर-अजमेर
प्रादेशिक समाचार
दिनांक 08.08.2024 समय: 18.45 बजे

- ऊर्जा मंत्री हीरालाल नागर कह्यो-अक्षय ऊर्जा रा हलका मांय साढे सात सौ मेगावाट सौर ऊर्जा अर अढाई सौ मेगावाट पवन ऊर्जा परियोजनावां स्थापित करी जावेला।
- राज्य मांय 13 ऊं 15 अगस्त तांई 'हर घर तिरंगा अभियान' चलायो जावेला।
- विश्व आदिवासी दिवस काल मनायो जावेला-प्रदेशभर मांय न्यारा-न्यारा कार्यक्रम राख्या जावेला।
- राज्य रा कुछ जिला मांय बिरखा रो दौर जारी-आवता दो-तीन दिन मांय केई ठोड़ां भारी बारिश रा आसार।

000

ऊर्जा मंत्री हीरालाल नागर कह्यो है के राज्य सरकार अक्षय ऊर्जा ने बधावो दे र प्रदेश रा किसानां ने साल 2027 तांई दिन मांय ई बिजली मुहैया करावण बाबत तेजी ऊं काम कर रही है। वे आज जयपुर मांय राखी ज्यी राजस्थान अक्षय ऊर्जा बिजनेस प्रमोशन समिट-2024 मांय बोल रह्या हा। वे कह्यो के राज्य मांय अक्षय ऊर्जा रा हलका मांय साढे सात सौ मेगावाट सौर ऊर्जा अर अढाई सौ मेगावाट पवन ऊर्जा परियोजनावां स्थापित करी जावेला।

ऊर्जा मंत्री बतायो के राज्य सरकार महज 7 महीनां मांय कुसुम-सी योजना रा तैत 4 हजार 386 मेगावाट री परियोजनावां रा लेटर ऑफ इन्डेन्ट जारी कर दीना है। वे कह्यो के केंद्र अर राज्य सरकार रा ऊर्जा उपक्रमां री मजबूत भागीदारी ऊं राजस्थान बेगो ई ऊर्जा रा हलका मांय न केवल खुद रे पाण ऊबो व्हेला, बल्कि दूजा राज्यां ने ई बिजली मुहैया करा सकेला।

.....

ई मौके राजस्थान विद्युत उत्पादन निगम लिमिटेड अर गेल इंडिया बीचे करार माथे सही करी ज्यी। ई रे मार्फत गेल इंडिया धौलपुर मांय लगायी ज्या 330 मेगावाट अर रामगढ़ मांय लगायी ज्या 270 दशमलव 5 मेगावाट रा गैस आधारित बिजली संयंत्रां ने और बेहतर बणावण री संभावना माथे काम करेला।

00000

राज्य मांय "हर घर तिरंगा" अभियान रा तैत 13 ऊं 15 अगस्त तांई घरां-दुकानां अर दफतरां माथे तिरंगो झंडो फहरावण रा अभियान री तैयारियां ज़ोरां ऊं चाल रही है। मुख्य सचिव सुधांश पंत आज वीडियो कांफ्रेन्सिंग रे मार्फत जिला कलेक्टरां सागे बातचीत कर र ई बारा मांय जरूरी हुकम दीना। झालावाड़ जिला रा प्रभारी सचिव डॉ. रवि जैन जनता ऊं 13 ऊं 15 अगस्त तांई घरां-दुकानां अर दफतरां माथे तिरंगो झंडो फहरावण री अपील कीनी। वे तिरंगा रैली, तिरंगा यात्रा, तिरंगा दौड़, मैराथॉन, तिरंगा शपथ अर तिरंगा मेळा सरीखा आयोजन करण बाबत ई कह्यो। हनुमानगढ़ रा जिला कलेक्टर कानाराम ई जनता ऊं घरां-दुकानां अर दफतरां माथे तिरंगो झंडो फहरावण री अपील कीनी है। डीग जिला रा प्रभारी सचिव वी सरवन कुमार आज कुम्हेर मांय हर घर तिरंगा अभियान री सरूआत कीनी।

अभियान रा तैत जिला रा सगळा उपखण्डां मांय मोटरसाइकिल रैली, तिरंगा यात्रा, मैराथन, तिरंगा मेळा अर तिरंगा सेल्फी सरीखा कार्यक्रम राख्या जावेला। तिरंगा मेळा मांय राजीविका ऊं जुड़्या खुद सेवक समूहां री महिलावां कानी ऊं बणायी ज्या सामान रो दरसाव कर्यो जावेला अर उद्योग विभाग री ओर ऊं प्रदर्शनी लगायी जावेला। प्रभारी सचिव जनता ऊं घरां माथे तिरंगो झंडो

फहरावण री अपील कीनी। वे सरकारी दफतरां, स्कूलां अर आंगनबाड़ी केन्द्रां माथे ई तिरंगो झंडो फहरावण रा हुकम दीना।

00000

सलूमबर ऊं भाजपा रा देवलोक व्ह्या विधायक अमृतलाल मीणा रो आज वां रा गांव लालपुरिया सेमारी मांय पूरा मान सागे दाग कर दियो ज्यो। मुख्यमंत्री भजन लाल शर्मा ई वां रा दाग मांय शिरकत कीनी अर वां रा पिरवार वाळां ने ढाढस बंधायो। अमृत लाल मीणा आज संवारे हार्ट अटेक आवण ऊं देवलोक व्हे ग्या हा। प्रधानमंत्री नरेन्द्र मोदी विधायक मीणा रे देवलोक व्हेवण परा दुःख जतायो है। शोक संदेश मांय प्रधानमंत्री कह्यो के मीणा भारतीय जनता पार्टी रा कर्मठ कार्यकर्ता हा, ज्यो वां रा विधानसभा हलका रा विकास समेत पार्टी रा संगठन ने मजबूत बणावण मांय योगदान कीनो। राज्यपाल हरिभाऊ किसनराव बागडे ई मीणा रे देवलोक व्हेवण परां गहरो दुःख जतायो है। गृह मंत्री अमित शाह ई अमृत लाल मीणा रे देवलोक व्हेवण परां दुःख जतायो है।

000

काल विश्व आदिवासी दिवस मणायो जावेला। ई मौके प्रदेश मांय ई न्यारा-न्यारा कार्यक्रम राख्या जावेला। राज्यपाल हरिभाऊ किसनराव बागडे विश्व आदिवासी दिवस री बधाई दीनी है। वां रा संदेश मांय राज्यपाल कह्यो के आदिवासी समाज कुदरत ऊं करीब ऊं जुड़योडो है। वे आदिवासी समाज ने विकास री मुख्यधारा मांय लावण अर वां री बरकत सारू मिल र काम करण री अपील कीनी। आदिवासी दिवस रा सिलसिला मांय आज टोंक जिला रा देवली रा सरकारी कॉलेज मांय वैचारिक संगोष्ठी राख्यी ज्यी।

आदिवासी दिवस रा सिलसिला मांय भारतीय जनजातीय सहकारी विपणन विकास संघ-ट्राईफेड री ओर ऊं काल ऊं 18 अगस्त ताई उदयपुर रा भारतीय लोक कला मंडल परिसर मांय जनजातीय उत्सव आदि बाजार सह आदि चित्रा कार्यक्रम राख्यो जावेला। इण मांय दस राज्यां रा जनजातीय पिरवारां कानी ऊं हाथ ऊं बणायी ज्या सामान री प्रदर्शनी लगायी जावेला।

00000

राज्य मांय हरियाळो राजस्थान अभियान रा तैत आज ई केई ठोडां पौधा रोपी ज्या। सवाईमाधोपुर मांय एस.पी. ममता गुप्ता एक गैर सरकारी स्कूल रा विद्यार्थियां सागे पुलिस परेड मैदान मांय पौधा रोप्या। ई मौके एस.पी. स्कूली विद्यार्थियां ने पौधा रोप र वां री सार सभाळ बाबत कह्यो। वे पुलिस वाळां ऊं ई कम ऊं कम एक पौधो रोप र वां री सार-संभाळ करण बाबत कह्यो। सांचौर मांय ई जिला कलेक्टर रा दफतर मांय कर्मचारियां री ओर ऊं पौधा रोपी ज्या।

00000

पेरिस ओलिंपिक रा 13 वां दिन आज पुरुषां री 57 किलोग्राम फ्री-स्टाइल कुश्ती होड मांय भारत रा अमन सेहरावत सेमीफाइनल मांय पूग ग्या। वे क्वार्टर फाइनल मांय अल्बानिया रा जेलिमखान अबाकारोव ने 12-0 ऊं शिकस्त दीनी। वां रो आज रात जापान रा रे हुजी सागे सेमीफाइनल मुकाबलो व्हेला। महिलावां री गोल्फ होड रा दूजा राउंड मांय भारत री अदिती अशोक 10वीं अर दीक्षा डागर 12वीं ठोड माथे चाल रही ही। भारत री पुरुष हॉकी टीम कांसा रा तमगा सारू खेल्या जा रह्या मुकाबला मांय आखिरी समाचार मिलण ताई स्पेन रे खिलाफ दो-एक ऊं आगे चाल रही ही। भाला फैंक होड मांय भारत रा नीरज चौपड़ा आज रात तमगो जीतण री होड मांय उतरेला। भारत फिलहाल कांसा रा 3 तमगा जीत र 68 वीं ठोड माथे है।

000

राजस्थान कर्मचारी चयन बोर्ड री ओर ऊं 11 अगस्त ने लिपिक ग्रेड-द्वितीय, कनिष्ठ सहायक संयुक्त सीधी भर्ती परीक्षा ली जावेला। दो पारियां मांय व्हेवण वाळी आ परीक्षा जयपुर शहर मांय 84 केन्द्रां माथे ली जावेला। ई परीक्षा सारू 23 हजार 907 उम्मीदवार नाम मंडाया है। जयपुर रा जिला कलेक्टर प्रकाश राजपुरोहित बतायो के इन्तेहान सही तरीका ऊं करावण बाबत कलेक्ट्रेट

मांय कन्ट्रोल रूम बणायी ज्यो है जो काल अर 10 अगस्त ने संवारे 10 ऊं सिंज्या पांच बज्या ताई अर 11 अगस्त ने संवारे 7 बज्यां ऊं इम्तेहान पूरो व्हेवण ताई काम करेला। जयपुर रा परीक्षा केन्द्रां सारू कन्ट्रोल रूम रो नम्बर 0141-2206699 है।

000

राज्य रा आतूणी हलकां मांय तेज बरसात रो सिलसिलो रूक ग्यो है पण ऊगणी हलका मांय जयपुर समेत केई जिला मांय रूक-रूक र मेह बरस रह्यो है। धौलपुर मांय बिरखा रे कारण एक मकान री भीत ढस जावण ऊं ई हेटे दब जावण ऊं एक जणी री मौत व्हे गयी। दौसा, करौली, भरतपुर अर बारां मांय काल मोडी रात ऊं ई बिरखा व्हे रही है। अलवर, सवाईमाधोपुर, सीकर, झुंझुनू, चुरू, कोटा अर झालावाड़ मांय ई बिरखा रा समाचार है। टोंक मांय आज संवारे छांटो-छिड़को व्ह्यो, जदके जैसलमेर मांय बादळा मंड्या रह्या। मौसम विभाग आज ई प्रदेश रा 9 जिलां मांय जोरदार बिरखा सारू चेतायो है। मौसम केंद्र जयपुर रा निदेशक राधेश्याम शर्मा बतायो के राज्य मांय आवता दो-तीन दिन मांय केई ठोड़ां जोरदार मेह बरसबा रा आसार है।

.....

ई बीचे राज्य मांय हाल ताई सामान्य ऊं 39 फीसदी ऊं बत्ती बिरखा व्हे चुकी है। मौसम विभाग रे मुजब हाल ताई 362 दशमलव 7 मिलीमीटर पाणी बरस ग्यो है। राज्य रा ऊगणी जिलां मांय 25 फीसदी जदके आतूणी जिलां मांय 61 फीसदी बत्ती बिरखा दर्ज करी ज्यी है।

0000

भारतीय रिजर्व बैंक-आरबीआई चालू माली साल सारू सकल घरेलू उत्पाद-जीडीपी मांय बधोतरी री रेट सात दशमलव दो फीसदी माथे रेहवण रा आसार जताया है। चालू माली साल री तीजी द्विमासिक बैठक पाछे आरबीआई रा गवर्नर शक्तिकांत दास कह्यो के मौद्रिक नीति समिति छह-चार रा बहुमत ऊं रेपो रेट साढे छह फीसदी रा लेवल माथे ई बणायी राखण रो फ़ैसलो कीनो है। आरबीआई रा गवर्नर बैंकां ने जमा मांय गिरावट ऊं तरलता ऊं जुड़ी समस्या रो सामो करण बाबत सावचेत रेहवण सारू कह्यो। रिजर्व बैंक यूपीआई रे मार्फत चुकारा री हद 1 लाख ऊं बधा र 5 लाख रुप्या करण रो फ़ैसलो ई कीनो।

00000